


पिसागोटनोर येसु



दुनियातोरु कु बेसता हरि हुप्सानोर

पूना पुल्लेना अर्तम

आसिर्वादम: मनकालोर्कुंक पेन हीतन इत्ता अन्नि बेसता पोल्लेगें आसिर्वादम आंद.

ईस्टर: हामुरताल येसु मर्रा जीवाते तेदतदुन पीसि कियना उंदि पंडुगु. इव रोजकुने यहुदिल्कु दाटसि होनना पंडुगुगुडा कींतुर. (पेज नं.38-54)

किरिस्तु: 'अबिसेकम आता राजाल'. इद पोल्लेतुन हिब्रु बासाते मेस्सया आनि ग्रीक बासाते क्राइस्ट इंतुर. (पेज नं.52,55)

क्रुस: रोम सरकारतद सिक्सा हिच्यना उंदि कोय्या. येसुना हामुर इदे क्रुसुनपोरों पेनदा इस्टापरकारम आता. ओना सिस्स्युल्कुंक इद उंदि चिन्ह आता. (पेन नं. 25,50)

गुंपु: येसुन विस्वासम कीतोर अंतोर उंदगा कलियसि, ओना हामुर आनि मर्रा जीवाते तेदमळतुन, हारिं तिचि अंगुर पानकम उंचि मति कींतुर. (पेज नं.41)

तेळियवा पोल्लेना अर्तम: देय्यम: इद दिस्सो. गानि इद पेनदाद आनि मनकना पगातद आंद. (दुस्टात्मागुडा इंतुर)

पवित्र आत्मा: इद पेनदा आत्मा आंद. येसुन विस्वासम कियानोर्क पेन दाना आत्मातुन हींता. (पेज नं.58)

पापम: पेनदा इच्छाता विरोदमते मनम कियाना अन्नि कबाह्कुन पापम इंतुर. इसोंटा पापि गुनम, मना हाटीं पेनदागा मत्ता उद्देसमतागाटाल मनाकुन तप्पिचंता. (पेज नं.4)

पारतना: पारतना इत्ते पेनतोन वळकमळ आनि पेनदुन केंजमळ. (पेज नं.18,19,42)

पेनदा दूता: इद उंदि पेनदा कबुरतद आंद. इद मनाकु दिस्सो. (पेज नं.5)

पेनदा मर्रि: कुद्दु पेन आसि, मनकना रूपमते बूमिपोरों वाता पेनदा मर्रि, येसुना पोरोल आंद.

पेनदा राज्येम: पेनदा पोल्ले परकारम लोकुल्क बगायते ताकंतुरो, अगा पेनदा राज्येम मनंता.

बस्केळक पिस्सना पिस्वर: पेन इन्कुत्ताप येसुनतोनिसि पिसमळतुन बस्केळक पिस्सना पिस्वर इंतुर. इसोंटा पिस्वरतुक हामुर हिल्ले. दीनकु बस्केन अंतेम हिल्ले. (पेज नं.23, 29-30 आनि 59)

बायबल: लोकुल्कुना कबाह्कु, पिस्वरतुन हूळसि पेन बतल इंता, आनि मना कबाह्कुन मनम बलहा दुरुस्त कियाना इंचि बायबलते रासि मंता.

मर्रा जीवाते तेदमळ: येसु हामुरताल मर्रा जीवाते तेदतोर. अल्हेने उंदि रोजु, अंतोर मर्रा जीवाते तेदानुर. पजा पेन अंतोर लोकुल्कुना न्यायम किय्यार. (पेज नं. 53-57)


मल्लिस वायमळ: येसु बूमिपोरों मल्लिस वातास्के, अन्नि मर्रा पूनें तयार आंता. बूमि, स्वर्गमतुन पेन पूनगा किय्यार. (पेज नं. 57)

मापि: मनम कीता पापमतुन पेन मापि कींता. अल्हा हूळते मनम मापिलायक हिल्लोम. गानि मनाकु बद सिक्सा अयते दोर्कना मत्ता अद सिक्सातुन येसु कुद्दु ओनापोरों येतकुत्तोर. अदुनहाटीं मीकु ओक्कला मिमेट कीता पापालकुनाहाटीं पस्चतापम अन्पिच्चि, मनसु मार्सकुनना इच्छा मनानयते मापि दोर्का पर्रंता. (पेज नं.58)

येसु: पेनदा मर्रिना पोरोल आंद. दीन्कु अर्तम, 'पेन पिसागोटंता,' इल्हा मंता.

विस्वासम: पेन मीवाहाटीं बतल कींतन इत्ता, अद तप्पकोंटा कींता इंचि नम्ममळे विस्वासम. (पेज नं. 58)

सिस्स्युड: येसु वेहताप ताकानोर्कुन सिस्स्युल्क इंतुर. (पेज नं.18)





पिसागोटना येसु बोर आंदुर?

2000 वर्साना मुन्ने येसु इस्राएल देसेमते मत्तोर. ओन मनम 'पिसागोटनोर येसु', 'येसु किरिस्तु' इंतोम. दीना अर्तम ओर वरोर राजाल आंद. ओर सिराप राजाले आयो, ओन 'पेनदा मर्रि, मनकना रूपमते पुटतोरु,' इल्हागुडा इंतुर. दीना अर्तम ओर पेन आनि मनकलगुडा आंदुर. येसुना बारेमता एनकटा पोल्ले, बायबलते रासि मंता. दुनियाते अन्निकन्ना पेद्देद पोल्ले इदे आंद.

येसु मत्ता कालम

मनम मनना कालम येसुना पुटमळताल सुरुव आता. अद कालमते लोकुल्कु ताकसि हिलाकोंटे गाडिद, लोटापेटा, गुराल्कुनपोरों उदसि पयनम कियुंदुर. अस्के इस्राएलता सगोम एरिया इत्ते, युरोप कंडता मेन एरिया, अफ्रिका कंडता नड्डुम, तूर्पु आनि उत्तेरा एरिया, इदंता रोम सरकारता कय हिळु मत्ता. अद कालमते वेल्ले लोकुल्कुंक हद्वुळ-रासुड वायाकोंदु, सिराप इस्राएलता यहुदिल्कुंके वायुंदु. अदुनहाटीं, 'पुस्तकमतोर' इंचि ओर्कुन केयुंदुर.

अद पुस्तकम लोप्पो पेन वेहता पोल्लें रासि मंतां. इद दुनियाते मनानव अन्निकवुन पेने तयार कीता. अद पेन लोकुल्कुतोनि दंटा-दंटा मनंतन इंता. इद पोल्लेतुन येसु ओना पिस्वरताल बेस किलियर हुपिस्तोर.





येसुना कालमता इस्राएल देसेम

राजदानी: येरुसलेम

राज्येल्क: गालिल, सामरिया, यहुदिया.

नेरवु: दगेर-दगेरा 28,000 किमी वर्ग


वातावरनम: गिचचो गरम-गरम

राज्येम: येसु पुट्टका मुन्नेटाले 63 वर्सानाल रोम राजालोर इस्राएल देसेमपोर्रो राज्येम कीसेके मत्तुर.


सरकार: येसुना कालमते तिबेरियुस इनानोर अंटोर्कन्ना पेद्दा राजाल मत्तोर. ओना हिछु पुंतुस पिलानुस इनानोर इस्राएलता राज्यपाल मत्तोर.

दर्म: यहुदि दर्म. यरुसलेमते यहुदिरद उंदि गुळि मत्ता. अगा पेर्मालोर रकारकाल्कुना कबाहक कियुंदुर. आनि दर्मसास्त्रम कराहना गुरुल्क (परिसिल्कु) लोकुल्कुंक बायबलताल करहुंदुर.

बासा: हिब्रु (यहुदिल्कुना बासा), ग्रीक (अन्नि राज्येल्कुने वळकना बासा), लटिन (रोमियिल्कुना बासा)



ईर अंटोर बेरेटागा बारि जमा आतुर मरि?



मिमेट तयार आसि मंटु,
पेनदा राज्येम वासेक मंता!




उंदि पूना पिस्वर
सुरुव कीम्टु!



मिमेट पेनदाल तपिचकुना पर्रिट,
पेनदा न्यायम कियना मर्सु मरा
मोदोल्क दल्लिसे मंता.



बेसता पंडिं हादवा हरेक मरातुन
नर्किसि तडमिते वाटमळ जर्गार.





मनाकुन अंटोर्कुन नर्किसि पोहमळ
जर्गता बारे! मनम वरोरन्ना बेस
पिस्वर पिस्सनालायक मंतोमा?

पेनदा न्यायमताल वरोरगुडा
तप्सोन्नोर. गानि ना पज्जोटाल वरोर
वायानुर, ओर मीकुन लोप्पोटाल
मार्सिसि पिसागोटा पर्रांतोर.



मिमेट निजमे मीवा पिस्वरतुन
मार्सकुनना इनकुनानय्ते, मीवा
पापाल्कुन ओप्कुचि बापतिस्मा
येतालय एते वट्टु!




इंका पापम कियाकोंटा, इंदके
होचि उंदि पूना पिस्वर पिस्सट्टु.

आ प्रचार कियानोन, अंटोर बापतिस्मा हियना योहान इंचि इनुंदुर.

नना इनानद नावा बारेमते आयो. पेनदा बारेमते मनाकु वेहालय वरोर वांतोर, ओनाहाटीं नना हर्रि तयार कीसंतन. ओर पेनदा आत्मातोनि आनि पेनदा तडमितोनि बापतिस्मा मीकु हियनुर. दानहेंदाल मीवा पिस्वर पुरागा बदलांचार.



आनि पजा...



नना...
नना नीवाहेंदाल
बापतिस्मा येतगोम
सामि!




निमे अय्ते बापतिस्मा
हीम. पेनदा इच्चा
परकारमे मनम कियगोम.



बाबा, नीवा राज्येम
वायि, नीवा इच्चा
पुरा आयि.

अचानक उंदि अल्किर स्वर्गमताल...



हो! निमे नावा
पावरमगल्ला मर्रि
आंदिन, नना नीवा
बारेमते इरगा
कूस मंतन, इंचि
केंजावाता.

किरिस्तु वायनोर मंतोर इंचि बापतिस्मा हियना योहान
इसाएल लोकुल्कुन तयार कियालय दलगतोर. अव
तूकुल्कुने दुनियाते वेल्ले जेगाने रोम सरकार राज्येम
कियुदु, आनि इसाएल अठ्ठे उंदि सिन्ना राज्येम मत्ता.




गानि योरदन बेरेटागा बापतिस्मा हियना योहान,
येसुनेके वेलु हुपसंतोर.



पेनदा आत्मा ओन बय्लि
बूमिते ओंता.



अगा ओर वरोरे 40 रोजकु नर्का-पिय्यल मनंतोर. अगा मत्ताचुं
रोजकु ओर बतले तिन्नोर. ओर बताहाटीं वातोर, अदुनहाटीं
तयार आयालय ओर उपासम मंचेके पारतना कीतोर.



पेनदा इच्छातुन येसु पूरा
किया पींता. लोकुल्कुन
हामुर आनि ओरा पोरों मनना
दोसेमताल तपिच्चना इंचि
पेनदा मनसु मंता.



हीकटपोरों राज्येम कियना देय्यमतुन येसु गेलसंतोर. ई देय्यम दुनियातोरक
तकलिप कीसि ओर्कुन हामुरतेके तिरहालय ओरा पोरों राज्येम कींता.



गानि येसुक वेहता कबळताल ओन लक्कु
कियालय ओना मनसुने देय्यम लालचता
विचाराल्क पुट्संता.

निमे ओक्कला पेनदा मर्रिन आयानय्ते,
इद बंडातुन हारीं कीसि हुप्सा.

मन्नि!

“वरोर मनकल सिराप हारीं
तिंचे पिस्सोर, गानि पेनदा
तोळदाल पेयसाना हरेक
पोल्लेहेदाल पिसंतोर,” इंचि
पेनदा पुस्तकोमते रासि मंता.

निमेगिंटा पेनदा मर्रि आयानय्ते, गुळिता
कोस्सा कोडिडताल हिळु दुन्किसि
हुप्सा. बारित्ते, “पेनदा दूतां वासि
अवुना कय्दे नीकुन पोर्रेन पीतां,” इंचि
पेनदा पुस्तकोमते रासि हिल्लेना?

निमेगिंटा नावा काल्कुनपोर्रो अर्सि
मोळकानय्ते, नना ई दुनियापोर्रोटा
अन्नि अदिकाराल्क नीकु हींतन.

येसु अल्हा इत्तस्के, देय्यम येसुन
अग्गेन होळसि दांता, पेनदा दूतां
वासि येसुना सेवा कियालय दलगंतां.



मन्नि!
“निमे पेनदा
पट्टु हूळमा,”
इंचिगुडा रासि
मंता.




ए देय्यमतुना! ना मुन्नेटाल पेय्सि
होन. “सिराप पेनदुने मोळकाना,
दानादे सेवा कियना,” इंचि पेनदा
पुस्तकोमते रासि मंता.




येसु पवित्र आत्माते निडिसि
गालिलि राज्यमते वापस दांतोर.
येसु इस्राएलता उत्तेरातेके मनना
इदे राज्यमते पेद्दा बेर्सतोर. ओर
पेनदा पोल्ले कराहसेके होननेके
वेल्लेन लोकुल्कु ओना पज्जो
दांतुर. आनि पेनदा पुस्तकोमते
कबुरतोर रासता परकारम,
किरिस्तु इत्ते ई येसे आंदुर बारे!
इंचि लोकुल्कु वेल्लेन
कुसिते मंतुर.





गालिल राज्येमता गुट्टाने काना इनना नाटे, उंदि जेगाते मर्मि मनंतां.




येसुगुडा ओना यावल आनि
इच्चुर दंटागाहकुनतोनि आ
मर्मिने मंतोर.






गालिल सेरबुना दग्गेरा कपर्नाहूम इनना उंदि नार मंता, इद नार जिम्मां पिय्यानोरा नार इंचि पोरोल होल्ता. पेनदा राज्येम बारेमते अंटर मुन्ने कराहमळ येसु इदे नाटेनाल सुरुव कीतोर.




आनि अदे नाटे येसु ओना मोदाटा सिस्सुल्कुन पेरीतोर.




पत्रु, लोट एते दाकोम दा, अगा होंचि इस्रा नीवा ओल्ला!



सामि! मोमोट नर्का-पल्हिं कस्टपळतोम, गानि माकु उंदि जिम्मा इंका दोर्का हिल्ले.




गानि निमे इंचंतिन इंचि इंकुंदि मल्ला वाटंतोम कानि!



बतल! नाकु विस्वासम आसेक हिल्ले.




याकोब, योहान
हिंके वटु, वेल्लेन
जिम्मां अर्ती, नाकु
सहायम कीम्टु.




नना पेद्दा पापिन आंदुन,
नहागटाल लक्कु होन्नु.

निमे वेरियमा पत्रु.




इंदकेटाल मिमेट, मनकालोर्कुन
पियानोर आकिट.



ना पज्जो
वटु.

येसु ओना सिस्युल्कुनतोनि कलियसि गालिल राज्येमंता पेनदा राज्येमता बारेमते वेहासेक तिरियंतोर. बिमार मत्तोरकुन वेल्लेन मंदितुन बेस कींतोर. देय्याल्क पीसि मत्तोरगटाल देय्याल्कुन पेचहासि गेदुमंतोर, इदुन हूळसि लोकुल्कु इचंत्रम आंतुर आनि ओना पज्जो ताकांतुर. अचोने आयका वेरे-वेरे एरियानाल आनि इस्राएलता राजदानी आता येरुसलेमतालगुडा लोकुल्कु वांतुर.




पेनदा बेसतनम गावाले इनानोर्क पेन आसिर्वादम हींता, ओर्कु समादानम दोर्कार.




अळानोर्क पेन आसिर्वादम हींता, ओर मर्रा कुसिते कळ्वानुर.




नावाहाटीं लोकुल्कु मीकुन रोता-रोता पोळ्ळें इंतुर, अस्के मिमेट आसिर्वादम दोर्कुतोर आंदिर. मिमेट वेल्लेन कूस मंटु, मीकु स्वर्गमते पेद्दा इनाम मंता.




लोकुल्लु मीवातोनि बल्हा मनना
इंचि मीकु अन्पिच्चंतनो, मिमेट
ओरतोनि अल्हे मंटु.




मीवा पगातोरुंन पावरम कीसि
ओराहाटीं पारतना कीम्टु.



बेसता कबाहक कियनेके
लोकुल्लु हूळगोम इंचि कियमटु.




बोरन्ना मनकल उंदि मुरतटाहेके कराब
नदरते हूळते, ओर दानतोनि ओना
मनसुने बोगमतनम कीतोरे आंतोर.



मीवा कळु मीवा मेंदुल्ला वेलगु
आंद. मीवा कळु बेस मत्ते,
मीवा मेंदुलंता बेसे मनंता. गानि
मीवा कळु मागुर-मागुर मत्ते
मिमेट हीकटतेन पिसकिट.



बोरे मनकल उंदे मल्ला इव्वुर माल्लुकुना
सेवा किया परोर. इत्ते उंदे मल्ला पेनदुन
आनि सोम्मून पावरम किया परोर.



नाडिता बारेमते चिंता कियमट,
मोदाला पेनदा राज्येमतुन प्हकटु,
कळमतव अन्नि मीकु दोरुंनुं.




नना वेहताप मिमेट ताकानय्ते, बंडा पुनादिपोरों
लोन दोहानोरालेसीं आकिट, नना वेहताप
ताकाकोटे उसके पोरों लोन दोहानोरालेसीं आकिट.



उंदि रोजु कपर्नाहूम नाटे येसु मत्तास्के ओना लोन सुट्टु लोकुल्लु जमा आसेके मत्तुर.


मनम लोप्पो असल
होन्ने पर्रोम.



लोतापोर्रो एकसि
पेंकां तेंडिसि होनाका,
वेरे हर्रिए हिल्ले.

इगे पोर्रो बतल
जर्गसंता?

ओर्कुन नहगा वाया
हिम्टु, ना पोर्रो ओर्कु
वेल्लेन विस्वासम मंता.



नीवा पापालक
मापि आतां.

मिमेत केंजतिरा? ओर पापालक
बल्हा मापि किया पर्रीतोर?

पापालक सिराप पेने
मापि किया पर्रीता.


ओर पेनदा कारेड्डालक
कीसंतोर.

मीवा विचारम परकारम बद
पोल्ले अलकागा? नीवा पापालक
मापि आतां इन्मडा? हिलाकोटे
तेदसि ताका इन्मडा?



किरिस्तुंक पापालक मापि
कियाना अदिकारम मंता. गानि
ननागुडा, “तेदसि नीवा चटई
पीकुचि ताका,” इंतन.





ओहो बाप रे!

ओर ताकसंतोर.


हो! नना
ताका परंतन.

गानि येसु कीता कबळतुन
हूळसि अंतोर कूस हिल्लुर.
यहुदिलकुना पेद्दल्क,
नोमकेम रोजता नियमालकुना
पालन येसु कीसंतोरा इंचि
हूळसेके मंतुर. नोमकेम
रोजुनाडु इस्राएल ते बतले
कबळ कियानायो.



हुळाट! ई मनकना कय
वत्सोंचि मंता. इय्यला
नोमकेम रोजुने ईन बेस
कियमळ कुदरंतना, कुदरोना?

नीवा कय हाहा.




अरे बाप रे!
नना बेस आतन.





ई येसुन मनम
हक्किसी
पोहापींता.


येसु देसेमतुन
तप्पुड हरदुक
ताकिच्चंतोर. इद
पोल्ले येरुसलेमता
पेद्दल्क तप्पाकोटा
वेहा पींता.




अस्के येसु ओना सिस्स्युल्कुनतोनि गालिल सेरचुनेके होंचंतोर.









गुरु, मनम
मुळगसंतोम, तेदा!









मिमेट बारि वेरियतिर? मीवा
विस्वासम बेके होल्ता?













नना मीकु वेहांतन, मर्रि ओना विचारम परकारम बतले किय्योर, ओना बाबल कियनेके ओर बतल अयते हूळंतोरो, अदे ओर कींतोर. ननागुडा नावा मनसुंक वाताप बदे किय्योन. नाकुन लोह्चीता नावा बाबाना इच्चा परकारमे नना कींतन.




पारतना कियनाहाटीं येसु बस्केळक सुमसाम जेगाते दांतोर.




पजा उंदि नर्का पारतना आतंका, येसु ओना पन्नेड सिस्युल्कुन परंतोर. पेरसि ओर्कु अन्नि तीरकुना रोगाल्कुन बेस कियना अदिकारम आनि देय्याल्कुन पेचाह्चि गेदमना अदिकारम हीसि ओर्कुन इव्वुर-इव्वुर कीसि नार-नार लोहांतोर.



ओर पत्रु आनि ओना तम्मुर आंद्रेयल आंदुर.




याकोब ओना तम्मुर योहान ईर इव्वुर आंदुर.



इंका पिलिप आनि बर्तलमय ईर इव्वुर.


इंका तोमाल आनि मत्तयाल ईर इव्वुर. (ई मत्तयाल मोदाला रोम सरकारताहाटीं कर वसुल कियाना कबळ किय्युंदुर.)




तिद्दल आनि इंका वरोर याकोब, ईर इव्वुर.



इंका सरकारता विरोदमते मत्ता सिमोन आनि इस्कारियोत नाटेना यहुदाल ईर इव्वुर.



होंटु! मीकुन दग्गेरा कीकुनानोर नाकुन दग्गेरा कीकुतुर, नाकुन दग्गेरा कीकुनानोर, नाकुन लोहतोन दग्गेरा कीकुंतुर.




आ पन्नेंड सिस्सुल्क नार-नार तिरियसि येसु वेहता कबळ कीसि कुसिते मल्लिस वांतुर. पजा येसु ओर्कुन पीसि सांत जेगाते होंचि ओरतोनि पोल्लें कींतन इंतोर, गानि लोकुल्लुकु ओन होळसुर.

हूळाट! पंटा अयते वेल्लेन मंता. गानि कबळ कियानोर मात्रम गिचचुरे मंतुर. अदुनहाटीं पंटाता सामिं कु पारतना कीम्डु, पंटा कोय्यालय इंका कबळ कियानोर्कुन लोहनाहाटीं!




येसु पेनदा पोल्लें कराहसेके, लोकुलकुन बेस कीसेके मंतोर, अस्के अगा आलसेम आंता.

पिलिपु, इच्चोर वेल्ले लोकुलकुंक तिंडि बल्हा दोर्कता? ईरकु तिनालय मिमेटे बतलन्ना हींदु.



महगा सिराप 200 कोत्तां मंतां, इवुनतोनि अस्सिना गानि हालों.


ई पेडानगा हेय्युं हारीं आनि रोंडु जिम्मां इच्चुगे मंतां, गानि इव बगा हालनुं?



लोकुलकुन एबै-एबै गँगुल्क कीसि उद्दा वेहाट.




पजा येसु पेनदुक दन्यवाद कींतोर.



कीसि आ हारिन आनि जिम्मान तुकडां कींतोर.




अस्के अव तुकडान
वेयकुनां-वेयकु मंदि
पीरनिडा तितुर.



किरिस्तु वायाना मत्तोर,
ओर ईर बारिनो!

अल्हा अयते, मनम ईन
मना राजाल कीकोम.




हुळा! इंका
पन्नेड तट्टाना
तिंडि मयिस मंता.



इंदके लोकुल्लु लोहकुने होनना वेला आता. मिमेट
डोंगाने उदिस हब्बेर ओड्डुंक होंटु, नना इदे
गुट्टातगा आगिसि पारतना कीसि वांतन.






इच्चुर लोकुलकु येसुन राजाल
कियालय हूळांतुर. रोम
सरकारता जुलुमताल ओर
कापाळंतोर इंचि ओरा आसे.
येसुना विरोदमतोरगुडा वेल्लेन
बेरसतुर. ओर येसुन इरगा
तकलिप कीसेकेन मनंतुर.
इंका ओना विरोदमते
लोकुलकुन निल्हाचि ओन
हक्कालय हूळंतुर.



सामि, निमे इगे
बस्के वातिन?

नना मीकु तिनालय तिंडि
तासतन इंचि मिमेट
नाकुन पट्कसंतरा?

हवसोनना गाटोता बारेमते रंदि कियमट,
बस्केन हववुवद, बस्केळक पिस्सना
पिस्वर हियना गाटोतुन पट्कट.



पिसवर हियना तिंडि ननाने आंदुन
नना इद मेंदुलतुन दुनियातोर
पिसवरताहाटीं हींतन.



ई मनकल ओना मेंदुलतुन मनाकु
तिनालय बल्हा हिया परींतोर?

इद वट्टिट पोल्ले आंद.



बेकेतोर
हेके होंटु.







ईर अंतोर्कुन
नडेह कीसंतोर.




मिमेटगुडा नाकुन
होळसिसि होनना
विचारम कीसंतरा?

सामि, नीकुन होळसिसि मोमोट
बोनगा दाकोम? बस्केळक
पिस्सना पिस्वरता पोल्लें अय्ते
निहागेन मंतां.






येरुसलेम सहरता पलाते कुसुनपोर्रो लोकुकुन हवकुंदुर, अद रोम सरकारताहेंदाल हियना कतरनाक हामुर सिक्सा आंदु.



नावा पज्जो बोर अयते वांतन इंतोरो, ओर ओना इस्टालक होळसि नावाहाटीं तकलिप अर्रांना तयारते नावा पज्जो वायिर.



बोर अयते सतता जीवातुन कापाळकुनालय हूळांतोर, ओर ओना जीवातुन पोगोटकुंतोर. गानि बोर अयते ओना जीवातुन नावाहाटीं पोगोटकुंतोर, ओर ओना जीवातुन कापाळकुंतोर.



सिराप उंदे पेन इंचि, मीकु तप्पाकोंटा तेळिया पींता.



असल पोल्ले बतल इत्ते, मिमेट पेनदुन मीवा जीवा तासि पावरम कीम्टु, इंका मीवद मिमेट बच्चोन पावरम कीत्तिटो, अचोने पावरम इंका वरोनगुडा कीम्टु.




अद वेलाते, इस्राएल देसेमते कुस्टरोगम आतोर मनुंदुर. कुस्टरोगम वेल्लेन कतरनाक रोगम आताहाटीं, बोर्क अय्ते अद बिमारि मंता, ओर्कुन बेस मत्तोर, इट्टुड तूनो इंचि ओर्कुन नाटेना पलाते इरूदुर.




कुस्टरोगम आतोरक बेकेनना होनना मत्ते, ओर वायनद लोकुल्कुक् तेळियनाहाटीं ओर मोत्कुंचेके वायुंदुर.

कुस्टरोगम आतोरम वासंतोम, लक्कु होंदु!



येसु, सामि!
मावा पोरो दया कीम.





होंटु, होंचि मीवा मेंदुल्लुन
मीवा पेर्माक हुपिचकुंटु.




पेर्मानगा बारि होन इंतोर
ईरू? तपासनि किया वेहुडा?

अस्केन मोमोट
बेस आंतोमा?




?

!




हूळाट!
नना बेस आतन!



मनम अंतोरमे
बेस आतोम!

हो!



हालेलूयाह!
पेन बच्चोनो
बेसतद, दन्यवाद!



बेस आतोर मिमेट पदि मंदि मना
हिल्लिरा? मरि कळमातोर बेके
होत्तुर? ओर पेनदुक दन्यवाद वेहुरा?



तेदट! मीवा विस्वासम मीकुन
बेस कीता, इका मीकुन
पिसागोटता.

येरुसलेमता यहुदि
पेद्दाल्क येसु पय्नमते
मननेके ओन तप्पुने
दोर्का पियानाहाटीं ओरा
सेवाकुल्कुन ओना पज्जो
लोहातुर. बारित्ते यहुदि
पेद्दाल्क येसु कियाना
ओना अन्नि कबाह्कुंक
विरोदम किय्युंदुर.

बोगमोताह्कु, रोम सरकारनाहाटीं कर
वसूल कियानोर, इसोटा बेस पोरोल हिलुवा
लोकुल्कुनतोन येसु कलियसि मनुंदुर.

हरिं तप्सोत्तोर्कुन पह्किसि,
ओर्कुन पिसागोटनाहाटीं
किरिस्तु वातोर.




येसु नोमकेम रोजुननाडुगुडा
बिमारितुन बेस कींतोर.

बेस आम!



आनि पिलाल्क इत्ते येसुंक
वेल्लेन पावरम.

पिलाल्कुन नहगा वाया हीम्टु,
बारित्ते पेनदा राज्येम ईरालेसीं
मनना लोकुरदे आंद.



येरुसलेम सहरता दग्गेरेन
बेतानि इनना उंदि नार मंता.
अगा लाजर इनानोर वरोर
बिमार मंतोर. अदुनहाटीं
अगा येसुन केया वेहामळ
जर्गता. लाजर आनि ओना
रोंड अक्काह्क मार्ता आनि
मरियम, येसुना बेस दंटातोर
आंदुर. येसु बेतानि एवतस्के,
लाजर हासि नालूं रोजकु
मुन्ने ओना गति आता,
इंचि तेळियता.



सामि! निमेगिंटा इग्गे मंचि मत्ते,
नावा तम्मुर हाया कोन्नेर.



नीवा तम्मुर मर्मा
जीवाते तेदांतोर मार्ता.



हो सामि! हातोर मर्मा जीवाते तेदाना
आकिर रोजुननाडु नावा तम्मुर मर्मा
जीवाते तेदांतोर इंचि नाकु एके मंता.



जीवाते मर्मा तेदमळ आनि पिस्वर
ननाने आंदुन. बोर अय्ते नापोरीं
विस्वासम इरानुर ओर पिस्सानुर.
इदुन निमे नम्मातिना मार्ता?






हो सामि! नना नमंतन. हीता पोल्ले
परकारम बोर अय्ते पिसागोटनोर इद
दुनियाते वायानोर मत्तोर, आ पेनदा
मरिन निमेन आंदिन.




लाजरुन बगा बोंदा दोसतिर?

वा सामि! हूळा वा!





जर्गनदंता हूळसि, येरुसलेमता पेद्दाल्क येसु आनि ओना सिस्युल्कुना बारेमते एक्कोने विचारम कियालय दल्गतुर.



आ मनकल वेल्लेन अद्बूताल्क कीसंतोर.

मनम ओन इल्हेन किया हीसेके मत्ते, रोम सरकार मनापोर्रो कारवाई कियनुर.


ओर मना गुळितुन आनि मना देसेमतुन नासडेम कियनुर.



मिमेटे विचारम कीम्टु! पूरा देसेम नासडेम आसि होनना दानकन्ना, वरोर मनकल हायमळे बेस.




अदुनहाटींगे, इंदके येसुन हक्का पींता.




अस्केटाल यहुदि पेद्दाल्क, येसुन दोर्का पीसि रोम सरकारुंक अप्पजेपालाय मोका हूळसेके मंतुर. बारित्ते हामुरता सिक्सा हियाना अदिकारम सिराप रोम सरकारुंके मत्ता.

येसु बेतानी नाटे मत्तास्के...




मरियम!




अच्चोन वेल्ले दराता
अत्तर नीय नासडेम
कीसंतिन!





अदुन अम्मिसि
वाता कोत्तां
गरिबोर्कुंक हीसि
मत्ते बेस मनवड.



दान बतल इनुमा यहुदा! नना
हायना वेला वाताहार्टी अद
नाकुन तयार कीसंता.



दाटसि होनना पंडुगु एब्सेकेन मत्ता.
अंटोर लोकुल्लुकु मंदानां-मंदां येरुसलेम होंचंतुर.



येरुसलेमते यहुदि पेद्दालक, येसुन
बल्हा दोर्का पिय्याना इंचि पिलान्क
कीसंतुर. अयना येसु मात्रम येरुसलेम
सहर होंचेकेन मंतोर.

लोकुकल ओन बेस दग्गेर कीकुंतुर.



कपडीं
तारकोट ददु.

होसन्ना!

पेनदा पोरोलते
वायाना मनकंकु
वेल्लेन आवसु!

इस्त्राएल देसेमता
राजाल आंतोर.




येरुसलेमतुना! सांति
बल्हा दोर्कता इत्ता
पोल्ले नीकु मुन्नेन
तेळियसि मंचि मत्ते
बेस आसि मनमड.
गानि निमे अदुन
गावाले इना हिल्लिन.




इंदके पूरा दुनियांता
ओना पज्जोने अर्ता.

मना पिलान्कु बतक
ओज्सा हिल्लें.



यहुदिलकुना मोळकाना जेगा
येरुसलेम सहर आंदु.




दाटसि होनना पंडुगनस्के, अगा
उंदि गोर्रेतुन मोक्कु हींतुर.




लोकुल्लु ओरा पापाल्लु पायसि
होंचि, पेनतोनि ओरा संबंदम बेस
आयनाहाटीं अल्हा मोक्कु हींतुर.



गानि उंदि जिवरासिता मोक्कु
लोकुल्लुकुन ओरा पापाल्लुकुनाल
तप्पिचा परंतना?





गुळिता दाराते लोकुल्लु, मोळकना जिवरासीं अम्मुड, अस्सुड
इंका कोत्तां अदला-बदला कियना कबळ कीसेके मंतुर.




अचानक अगा
येसुगुडा एव्तोर.







पेनदा लोनु पारतना कियना
लोन आंद, गानि मिमेट
दीनु दोंगालक मक्कना
जेगा कीतिर.



ई मनकल इरगेन
कतरनाक मंतोर. ओना
हरेक पोल्लेते लोकुल्लु
ओना पट्टुने अरसंतुर.



मनम ओन बिरानेन
हक्का पींता.




ओन बल्हा कीसि अय्ना हिरकिस्ते, मनम ओन हक्का परंतोम.

गानि पंडुगुना रोजकुने अल्हा बतले गडबड किया मन्नि.



ओन नना पीसि हीते, मिमेट नाकु बचोक कोल्तां हीकिर?

ईरू येसुना वरोर सिस्स्युड यहुदल आयोरा?




नना येसुन दोर्का पीसि मीकु हींतन.



येसुन पीसि हीते नीकु मोमोट 30 एंडि कोल्ता हींतोम, वरोर दासुन अम्मितेगुडा इच्चोने कोल्तां वांता.



दाटसि होनना पंडुगु
सुरुव आयाका मुन्ने येसु
लोकुल्लुकुं कराहसेके,
ओरतोनि वळकसेके मंतोर.
गानि अगाटा पेद्दाल्क
मात्रम येसुंक कस्टाल्क
हीसेकेन मनंतुर.




अद रोजु नुल्पेटा वेलाक, येसु आनि ओना
पन्नेड सिस्स्युल्क सहरते पंडुगुना गाटो
तिनालय उंदि जेगाते जमा आतुर.




इदे नर्का येसुन
ओर्कु पीसि हीकन.







नाकु तिप्पल्क आयालय सुरुव
आयाका मुन्ने मीतोनि कलियसि
गाटो तिनना ईचि कोरसेक मत्तन.




अदिकारम मत्ता लोकुल्लु वैरेतोरतोनि
ओरा सेवा किया वेहकुंतुर, गानि मिमेट
मात्रम अल्हा आयानायो.







मी लोप्पो बोर अय्ते एक्को सेवा
कीतोरो, ओर मीवा लीडर आयगोम.



नना मीवा नड्डुम वरोर
सेवाकुनलेहका मंतन.








नना होत्तंका, नाकुन मति
कियनाहाटीं इल्हा कीम्टु.




इद हारी, मीवाहाटीं
हियना नावा मेंदुलता
चिन्ह आंदु, इद येताट.



इद गिलासते मनानद पानकमतुन
उंटु, मीवाहाटीं नना पोंगागोटना
नावा नेत्तुर, दीनहेंदाल पेन
मीवातोनि उंदि पूना करार कींता.



नना मीकुन बल्हा पावरम कीतनो,
अल्हेन मिमेट वरोंक वरोर पावरम
कीम्टु, इद नना मीकु हियना नावा
पूना आदेस आंदु.



नावा पावरम मीवा लोप्पो मत्ते,
मिमेट नावा सिस्स्युल्क इंचि अंटोर
लोकुल्कु एरपाट कींतुर.



सामि! निमे बगा होत्ते, अग्गेन
वांतन, नीवाहाटीं नना नावा
जीवागुडा हींतन.

पत्रु, बदवेरदाका अय्ते, गोगोड
कूसोनो अदवेरदाका, मूड मल्का निमे
नाकुन एरपाट किय्योन इंचि इनकिन.

पजा नुलपेट्कु, येसु आनि ओना सिस्युल्कु, येरुसलेम
सहरताल पेय्सि दांतुर. गानि ओरतोनि यहुदल होन्नोर.

नना मीकुन होळसि होनना मंता, गानि पेनबाबाल
मीहाटीं पवित्र आत्मातुन लोहांतोर, अद मीकु
सहायम कीसेके बस्केळक मीतोने मनंता.

नना बगा अय्ते दांतन, अद जेगातगा
होनना हरिं मीकु एर्के मंता.

हरिं, सत्तेम आनि पिस्वर ननाने
आंदुन. नहगा वायाकोटा, बाबानगा
बोरे एव्वा परीर.

मिमेट इग्गेन आगट, पारतना
कियनाहाटीं नना इंकिच्यो
मुन्नेळक दांतन.

बाबा! ओक्कला कुदुरते, ई
कस्टाल्कुन नहगटाल लक्कु कीम.

गानि नना इत्ताप आयो, नीवा
इच्या परकारमे जर्गि.



तेदट! इसोंटा वेलातेगुडा मीकु
बल्हा निद्रा पीसंता? हूळाट!
नाकु दोका हियानोर इगे मंतोर.



नना बोन बुरंतन, ओने पीम्टु.




नमस्ते गुरु!

यहुदा! उंदि मुद्दु बुर्सि
किरिस्तुंक दोका हींतिना?



सामि! मोमोट
ईरातोनि लडाइ
कीकोमा?




मन्नि!



बस्के अयते येसु ओर्कु दोर्कालय मुनेळक
आतोर, अस्के ओना सिस्सुल्क अंतोर ओन
होळसि बेके दोर्कते हेकेन वित्तुर.

यहुदिलकुना अंटोर्कन्ना पेद्दा पेर्मानगा येसुन पीसि ओतुर. लक्कु मंचेके पत्रु आनि योहान ओना पज्जो-पज्जो वासेक मंतुर.



पत्रु मेल्लगा दाराते होळियंतोर.



निमे येसुनतोनि मना हिल्लिना?



हिल्ले, नना ओन एरपाटगुडा किय्योन.

निमे ओरावटेडाल वरोन आंदिन, निजमेना?






अस्सल आयोन!

नाकु पक्का एरपाट! निमे अगा मत्तिन. निमे गालिलतोन आंदिन.



मिमेट बोना बारेमते वळकसंतिरो, नाकु एर्का हिल्ले.



येसुन रोम सरकारना राज्यपाल पिलातुस इनानोनगा पीसि तत्तुर. अगा यहुदि पेद्दाल्कु पीसि वाता लोकुल्कु, अन्नि तीरकुना दोसेल्क दोस्सेके मोत्कुनालय दल्गुतुर.



ईर लोकुल्कु नीवा पोरो दोस्सना दोसेल्कुना बारेमते, निमे बतल इंतिन? बतले इनिना?



निमे बतल कीतिन?




नना सत्तेम बारेमते गवाइ वेहालय वातन.










सत्तेम इत्ते बतल?

नाकु अयते ई मनकना लोप्पो बतल तप्पु दोर्का हिल्ले. इंदके मीवा पंडुगु मंता, अयते मीवाहार्टी बोन होळसकन, बरब्बना हिलाकोटे यहुदिल्कुना राजाना?









क्रुसुनगा उंदि बल्लापोरें
मूड बासाने,
“यहुदिलकुना राजाल येसु”
इंचि रासि इरतुर.



येसुंक उंदि वेल्लेन कय्मुल जोमातुन
हीतुर, गानि ओर उना हिल्लोर.



सिपाइल्लक येसुना
कपडिनाहाटीं सिट्टिंटं वाटंतुर.



हो! ईर अय्ते
वेरेतोरुंन
पिसागोतानोर गदा?

निमेगिंटा पेनदा मर्रिन
आते, क्रुसुनपोरेंटाल
रेय्सि वा!



निमे सतातुन
पिसागोटकुंचि
माकुनगुडा
पिसागोटा.

पेनदुक गोडच्यो कदर हीम रो!
मनाकु अय्ते मनम कीता गलतिना
सिक्सा दोर्कसंता, गानि ईर अय्ते
बतले तप्पु किया हिल्लोर.



सामि, नीवा राज्येम
वातास्के नाकुन मति कीम.

नना नीकु निजम वेहासेक,
निमे इय्यालेन नावातोनि
स्वर्गमते मंदकिन.




पजा पिच्यटा वेलाक, पूरा
भूमिपोरो हिंरू हीकट आंता.



येसुना यावल मरियम आनि ओना सिस्स्युड
योहान, ईर क्रुसुना दग्गेरेन नित्सि मंतुर.

इंदकेटाल इद नीवा
तल्लुर, निमे दीना
मरिन आंदिन.



नावा पेनदुना, नावा पेनदुना,
निमे नाकुन बारि होळसीतिन?

नाकु दूपा
आसंता!



बाबा! नावा आत्मातुन नीवा
कय्दुक अप्पजेपसंतन.



नना कियाना
कबळ पूरा आता.



येसु पिच्यटा मूड एगाना वेलाक जीवा होळसंतोर. पजा वरोर सिपाइ ओना बरबद्दा बोक्काना हिळु गोकर्ति कोटकंतोर, अस्के एर आनि नेल्लुर पोंगांता.



पुस्तकाल्कुने इल्हा रासि मंता, “बलि हियालय ओयाना गोंरेतुन ओताप ओन ओतुर.”



“मना पापाल्कुनाहाटीं ओन तंतुर, गुद्दुर, गानि इंदके ओर हासोत्तोर.”



बोर अय्ते किरिस्तु वायाना मत्तोर, ओर इरिना बतला?



अय्ते ददु, ओना सेत्तातुन बोंदा दोस्सालय पूस कीकोम.



अरिमताइ नाटेना युसुप आनि निकोदेमस इनानोर येसुना सेत्तातुन येतकुंतुर. येतकुंचि गमागमा गब्बु वायाना वस्तुकु होकसि उंदि तेल्लटा कपिड गंडाते हुट्टांतुर. हुटसि, पेद्दा बंडातुन तुल्हाचि तयार कीता उंदि बोंदाते ओन इर्रांतुर.



पजा पलविसि रोजु, पंडुगु
मारतंका, इच्चुं मुर्ताहक
येसुना बोंदातगा दांतां.



अड्डम दोस्सि
मत्ता बंडा लक्कु
दोब्बिसि मत्ता.



जीवाते मत्तोना हातोराव्टे बारि
हूळसतिर? ओर जीवाते तेदतोर. होंटु,
होंचि ई पोल्ले ओना सिस्सुल्लुकुं क वेहाट.



इद पोल्ले बस्के अय्ते पत्रु आनि
योहानुक तेळियता, अस्के ओर
बिराना बोंदातेके वित्तर.








बतल आता?




इगे बतले हिल्ले.





अद रोजु येसुना इव्वुर सिस्युल्क, येसुना बारेमते वेल्लेन दुक्कमते वळ्कसेके दांतुर. ओर होनना हर्दे वरोर मनकल ओरतोनि कलियसि पोल्लेन कीसेके दांतोर.

अय्ते, पेनदा कबुरतोर वेहतद मिमेट नम्मिरा? किरिस्तु इरगा तिप्पल्क बोगांचि, पजा वेल्लेन पेद्दातनमते पेनदागा दांतोर, इवन्नि पोल्लेन पेनदा पुस्तकाल्काने मुन्नेटाले रासि मंतां, मीकु तेळियोना?



ओर बोजनम क्रियाना वेलाते, अचानक ओरतोनि वळ्कसेके मत्तोर दिसाकोटा आंतोर.

हो!
ओर येसे
आंदुर रो!



अस्के ओर अगाटाल बिराना तेदसि येसुना कळमाता सिस्युल्कुं कलियालय येरुसलेम दांतुर.


मोमोटे सामिन
हूळतोम!

मोमोटे आयो,
मरियम आनि
पत्रुगुडा हूळतुर.



अस्के अचानक...

मीकु अंटोर्क
साति दोर्कि!




नना येसुने आंदुन इंचि मिमेट नम्मिसेक हिल्लिरा? हुळाट, नावा कय्क-काल्कुना बर्री!




नावा
सामि,
नावा
पेनदुना!




येसु ओना सिस्सुलकुंक
40 रोजकुनदाका दिसंतोर.
अचोने आयका 500 मंदिकु
उंदे मल्का दिसंतोर. उंदि
रोजु गालिल राज्येमते ओना
इच्चुर सिस्सुलक सेरवुने
जिम्मा पीसेके मनंतुर.





पत्रु, निमे निजमे
नाकुन पावरम
कीतिना?




येसु पत्रुन ई सवाल
मूड मलकां पूसकींतोर.



हो सामि, नीकु एके मंता
गदा, नना नीकुन पावरम
कीतन इंचि.

अल्हा अयते नावा
गोर्रेनसंटोर्कुन बेस हूळकुन.




नावा पज्जो
वटु!

स्वर्गम आनि इद बूमिपोरो मनना
अन्निटवुनपोरो पेन नाकु अदिकारम हीता.
अदुनहाटीं मिमेट इद दुनियाते अन्नि जेगाने
होचि ओर्कुन नावा सिस्युल्क कीम्टु, ओर्कु पेन
बाबाना पोरोल्ले, पेन बाबाना मर्रिना पोरोल्ले
आनि पवित्र आत्माता पोरोल्ले बापतिस्मा
हीम्टु, नना बतल अयते मीकु कराहतानो, अव
अन्निन पीसि ताकालय ओर्कु कराहट.



नना बस्केळक मीतोने मंनंतन, ई दुनिया
मुळगांना आकिर रोजुदाका नना मी तोळ
मंनंतन, इदुन मतिते इर्राट.



इव पोल्लें आतंका,
येसु ई बूमितुन होळसि,
स्वर्गमते दांतोर. होननेके,
“नना होंचंतन, गानि अंतोर
लोकुलकुना न्यायम कियालय
मर्रा मल्लिस वांतन,” इत्तोर.

पजा येसुना सिस्स्युल्क अंटोर,
पारतना कीसेके येरुसलेमतेन
मनंतुर. पेनदा पवित्र आत्मा
ओरा लोप्पो रिंडंता. येसुना
लोप्पो मत्ता आत्मे इंदके
सिस्स्युल्कुना लोप्पो मनंता.
येसुना बारेमता गवाइ वेरे
लोकुल्कुं वेहालय ई आत्मा
ओर्कु इरगा हिम्मत हींता.

हुळाट! मिमेट
बोर येसुन अयते
कुसुनपोरों
हळ्कतिरो, आ
येसुन हामुर पीसि
इर्रा पराहिल्ले.
पेन ओन जीवाते
तेहाचि, सामि आनि
किरिस्तु कीता.



विरोदम कियानोर वेल्लेन अयना गानि
येसुना सिस्स्युल्क मात्रम दुनियांता पैलांचंतुर.

येसु पेनदा
मरिं आंदुर.



इद पोल्ले सिट्टिने
रासिगुडा दुनियाते
वेहामळ जर्गता.

येसु कुसुनपोरों
हातास्के, ओर मना
पापालकुन ओना
सतता मेंदुल्ले येतकुंचि
हासोत्तोर. अदुनहाटीं
मनम पापमताहाटीं
हासोत्तोम. आनि
इंदकेटाल मनम बल्हा
पिसते पेनदुक नच्चंतनो
अल्हा पिस्सावच्चु.



दुनियातोर येसुना अंटोर
सिस्स्युल्क इंदके बगा मनिना,
उंदागा जमा आसि पारतना
कींतुर, बायबल हद्वंतुर.
येसुना हामुरतुन मति कीसेके
हारी तुकडा आनि अंगुर
पानकम उंटुर. ओरा पिसवरते
मनना पेनदा पावरमतुन, ओरा
पक्कातोर्कु, सुट्टु-मट्टुनोर्कु
हुप्सना, वेहाना इंचि पेनदा
मनसु मंता.

मनकालोर्कुन देय्यमताल,
पापमताल पिसागोटना
पेनदा उद्देसमतुन येसु
वासि पुरागा कीतोर.



येसु मनाकुन पावरम कीतोर.
मनम ओन्कु बस्केळक दन्यवाद
कीसेके ओन्के मोळकागोम.



पेन दुनियातोर्कुन इच्चोन पावरम
कींता गदा, दाना वरोरे मर्रिनगुडा ई
दुनियातोरहाटीं हीता. ओन नम्मना
हरेक मनकल नासडेम आयामन्नि
गानि ओन्कु बस्केळक पिस्साना
पिसवर दोर्काना इंचि पेन दाना
मर्रिन ई दुनियाते लोहता.


बायबल

येसुना बारेमता पोल्ले बायबलते रासि मंतां. बायबलकन्ना एक्को मल्कां हदुवतद, वेरे बदे पुस्तकम हिल्ले. इद वेल्लेन पुस्तकाल्कु कलियसि तयार आतद उंदि पुस्तकम आंद. इद पुस्तकमतुन रासालय 1500 वर्सां दलगतां. 1900 वर्साना मुन्ने इद बायबल रासमळ पुरागा आता. लोकुल्कुन पेन बल्हा ताकसंता इत्तदुना बारेमते बायबलते वेल्लेन तीरकुना पोल्ले दोर्कतां. येसुना बारेमता ई पोल्ले मनाकु, 'पेन इत्ते बोर?' इनना संगति किलियर हुप्संता.

येसुना बारेमता पोल्ले

बायबलते 4 पुस्तकाल्कुनगा येसुना पिस्वरता बारेमते रासि मंता. अव पुस्तकाल्कुन रासतोर येसुना कालमते मत्तुर.

- 1. मत्तयाल:** ईर येसुना वरोर सिस्स्युड. कर वसुल कियाना कबळ कियुंदुर. येसु इस्राएल लोकुल्कुनतोनि बल्हा ताकतोर इत्तदुन ईर रासतोर.
- 2. मरकुस:** ईर येसु अद्बूतामाता कबाहकुना बारेमते रासतोर. येसु इव कबाहक कीता कालमते ई मरकुस लेय्या पेडल मत्तोर.
- 3. लूकाल:** ईर वरोर डॉक्टर मत्तोर. ईर बस्के येसुन हूळा हिल्लोर, कलिया हिल्लोर. अयना लोकुल्कुनतोनि येसु बल्हा मनुंदुर इनना बारेमते रासतोर.
- 4. योहान:** ईरगुडा येसुना वरोर सिस्स्युड आंद. ईर विसेस कीसि, येसु बोर आंदुर? लोकुल्कुन ओरा पापाल्कुनाल पायसनाहार्टी मनकल आसि वाता पेन येसु आंदुर, इंचि रासतोर.



येसुना पुटमळ

येसु पुटतस्के, येसुना यावल मरियम मर्मि आसि मना हिल्ले. येसु पुट्टनदाका अद मर्मि आयाकेन मत्ता. पेने कुद्दु दाना पीटे येसुन वाटता. ई इचंत्रम आयाना पोल्ले बारेमते, येसुना कालमकन्ना वेल्लेन वर्सा मुन्नेन पेनदा पुस्तकाल्कुने रासमळ जर्गता. येसु पेद्दा हीरोना पुट्कु पुट्टा हिल्लोर. ओर कुद्दु पेनदा मर्मि आसिगुडा गरिबोनलेह्का उंदि कोळकाते पुट्टोर.

येसु कीता अद्बूतामाता कबाह्क

येसु वेल्लेन अद्बूतामाता कबाह्क कीतोर. 40 कन्ना एक्को अद्बूतामाता कबाह्क येसु कीताप बायबल वेहंता. दीना अर्तम बतल इत्ते, इल्हा कीसि येसु पेनदा ताकततुन आनि पावरमतुन हूपिस्तोर. अचोने आयका पेन लोकुल्लुक सहायम कीसि ओर्कुन कुसिते, आनंदमते इर्ललय हूळसंता इंचिगुडा हूपिस्तोर.





येसुना हामुर आनि हामुरताल मर्रा जीवाते तेदमळ

येसु बारि हातोर? इदुना बारेमते जानकारि बायबलते रासि मंता.

लोकुल्कु अंतोरगुडा तप्पु कबाहक कींतुर. अव कबाहक पेनदुक होंग वायनाल, दुक्कम वायनाल कींतां. अवुने पापम इंचि इंतुर. अव अन्नि पापाल्क लोकुल्कुन पेनतोनि कलियसि मनाकोटा लक्कु कींतां.

दानाहाटिंगे आते येसु वातोर. येसु कुद्दु मना पापाल्कुना सिक्सातुन ओर सतागा येतकुत्तोर. अद सिक्सा हामुर सिक्सा आंद. इल्हा येसु मनाहाटीं हातोर. अदुनहाटीं मनम मर्रा पेनतोनि कलिया परंतोम. गानि मनम कीता अन्नि पापाल्कुन कुद्दु ओप्कुनापींता.

येसु हामुरताल मर्रा जीवाते तेदतोर, पेन बाबल ओन मर्रा जीवा अरहता. अल्हा कीसि येसु हामुरकन्ना एक्को बलमातोर इंचि पेन हुपिस्ता.

येसु इंदके पेनबाबान तोनि मंतोर. ओर जीवाते मंतोर इंचि बस्केळक मनाकु तोळ मना परंतोर. पेनदुक कुसि हियानसोंटा पिस्वर मनम पिस्सानाहाटीं ओर मनाकु सहायम कियालय तयार मंतोर.

पारतना

ओक्कला मिमेट तप्पु कीतिट इंचि मीकु अन्पिस्ते, पेनदुन मापि तल्कालय, इल्हा पारतना कीम्टु:

“पावरमगल्ला पेनदुना, निमे नाकुन पावरम कीतिन.

नीकु मत्ता वरोरे मर्रिनगुडा नावाहाटीं हीतिन.

नना कीता अन्नि तप्पुड कबाहकुनाहाटीं ओर क्रुसुनपोरों हातोर.

नना वेल्लेन तप्पुक कीसि मत्तन. नना कीता तप्पुकुनाहाटीं दया कीसि

नाकुन मापि कीम. येसु नावा तोळ मंतोर, अदुनहाटीं नीकु दन्यवाद.

बस्केळक नना नीवा मनकल आसि मनंतन.

नना बल्हा पिस्साना इंचि निमे इंतिनो, अल्हा नना पिस्सालय निमे नाकु

सहायम कीम. निमे बस्केळक नातोने मन्नु.

नावा पारतना केंजताहाटीं नीकु दन्यवाद.

निमे हीता पोल्ले परकारम निमे कीम!”

येसु आनि नीवा पिस्वर

येसुना बारेमता पोल्ले इंका मारा हिल्ले हुळा! येसु वेल्लेन मंदि लोकुकुना दंतातोर आतोर, इंदकेगुडा अल्हे आंतोर. दुनिया बदलांच्ता. वेल्ले लोकुकु इंदके गाडदिं, गुरांलुकुनपोरो उद्दिस पय्नम होन्नुर. कार, विमानालुकुने उद्दिस दांतुर. गानि दीनहेंदाल येसुक बतल परक अरो. ओर इस्राएल लोकुकुनतोनि अस्के बल्हा कलियसि मनुंदुरो, अल्हेन इंदके मनातोनिगुडा मना परंतोर.

ओर मनाकु दिस्सोर आयावच्चु, गानि ओर मात्रम निजम आंद. ओर इय्याला मीवा दंटा पिय्यालय हूळसंतोर. मिमेटगुडा ओना लेंगु केंजसि, ओर वेहताप ताका परंतोर.

येसुना बारेमते इंका तेल्लिचुकुनना मीवा मनसु मंताना? मत्ते हिळु वेहता परकारम कीम्टु:

1. मिमेट कुद्दु बायबल ह्द्वाना. (मोदाला लूकाल रासता बेसता कबुरतुन ह्द्वटु.)
2. पारतना कीम्टु. (पेनतोनि वळकालय, स्पेसल पोल्लेना अवसरम हिल्ले.)
3. येसुना बारेमते, बायबलता बारेमते वेरेतोरतोनि वळकटु. येसुना सिस्सुल्लुकु उंदगा कलियसि वरोंक-वरोर दैरनेम हिय्यना इंचि येसुना मनसु मंता.

Text and illustrations: Willem de Vink.

Copyright © 1993 Stichting Wereldtaal, Houten, The Netherlands.

Published in Dutch as “Jezus Messias”.

Edition in Aheri Gondi © 2018

Digital copyright under the terms of the Creative Commons BY-SA licence.

All rights of translation, reproduction and adaptation reserved for all countries.

e-mail: jmpbk.app@gmail.com



पिसागोटनोर येसु

इद येसु किरिस्तुना बारेमता सत्तेम पोल्ले आंद. 2000 वर्साना मुन्ने इस्राएल देसेमते ओर मत्तोर. अद कालमते बोर-बोर ओन्कु कलियतुरो, अंतोर इचंत्रम आयुंदुर. ओर बतल अयते कराहतोरो, कीतोरो अद इदवेरदाका बोरे किया हिल्लुर, येसु बगा-बगा मत्तोर, अगा-अगा अद्बूतम जर्गता. ओना पोल्ले केंजतोरक अंतोरक सुकम आनि सांति दोर्कुदु. गानि अचानक ओना विरोद कियानोर ओन हक्कतुर. अयना हामुर येसुन दोर्का पीसि इर्रा पर्राहिल्ले. मिमेटे हद्दिवसि अर्तम कीकुंदु!

बासा: अहेरी गोंडि

Language: Aheri Gondi

ISBN: 978-90-73150-77-5